

## AVANZA O ENCORO DE SELA

O presidente do Instituto da Água portugués anunciou que o estudo de impacto ambiental do proxecto de encoro de Sela vai ser sometido a consulta pública. O estudo, encargado polas dúas empresas promotoras (Unión FENOSA e Electricidade de Portugal), xustifica a construción da barragem, tentando minimizar a importancia dos seus altos custos ecolóxicos, sociais e económicos.

O encoro de Sela sería construído no tramo internacional do río Miño. Asulagaría unhas 500 hectáreas de terreos pertencentes aos municipios de As Neves e Arbo, en Galiza, e de Monçao e Melgaço, en Portugal. Causaría alteracións microclimáticas (aumento de néboas,...) que incidirían negativamente nos

cultivos, especialmente nos de vide, destinados á produción de viño albariño. Tamén sería prexudicial para o conxunto da fauna e da flora, en particular para os peixes migratorios (lamprea, salmón, sábel,...). Ademais, faría desaparecer baixo as augas máis de 600 pesqueiras, antigas construcións de elevado interese cultural e arquitectónico.




Foto Xosé Barrio

### “O LIXO ESPANHOL POLUI AS NOSSAS PRAIAS”

Este foi o titular da capa do Notícias Magazine do pasado 30 de xuño. O suplemento dominical máis lido en Portugal denunciou nunha reportaxe que as praias de Caminha e de Viana do Castelo están contaminadas por milleiros de envases de plástico, en parte procedentes dos vertedoiros municipais incontrolados de Baiona e A Guarda, situados na beiramar. Parte do lixo depositado nestes vertedoiros acaba no mar e espállassa polas costas, chegando até as praias do norte de Portugal.

A pesar das protestas motivadas polos graves danos causados ao ambiente e á saúde pública, “os-governos passam e as lixeiras continuam: na Galiza, ao pé do mar!”. O eurodeputado portugués e vicepresidente da organización ambientalista Globe (presidida por Al Gore), Carlos Pimenta, afirma que Galiza vai continuar a receber fondos da UE até 1999, mais “se os gasta todos em auto-estradas, é claro que não chega para acabar com as lixeiras”.

A Plataforma Ecoloxista Luso-Galaica dirixiu-se ao alcalde de Baiona e á alcaldesa de A Guarda para demandar a clausura urgente dos respectivos vertedoiros municipais e a recuperación ambiental das zonas afectadas. Tamén solicitou unha mudanza radical das políticas municipais de xestión do lixo, propoñendo a xeralización da recollida selectiva en orixe de todo o lixo e a súa reciclaxe e compostaxe, solución ecolóxica viábel a nivel comarcal.

### PLANO ESTRATÉXICO DOS RESÍDUOS SÓLIDOS URBANOS (RSU)

O Ministerio do Ambiente presentou a finais do pasado ano un Plano que reorienta a estratexia portuguesa en materia de RSU para os anos 2000 e 2005. O Plano está claramente condicionado pola existencia de avanzados proxectos municipais para a construcción de senllas incineradoras nas Áreas Metropolitanas de Porto e de Lisboa.

Partindo dunha situación parecida

á do noso país, o Plano pretende conseguir no ano 2005 as seguintes metas:

- Reducción	5%
- Compostaxe+Tratamento anaerobio	25%
- Reciclaxe	25%
- Incineración	22%
- Vertido controlado	23%

Segundo o Plano, a erradicación das lixeiras será unha realidade no ano 2000.

O Plano afirma que se conseguirá un valor medio de produción de lixo por habitante/ano que non superará os 300 Kg, sinalando que “este número constituirá um permanente padrao de referencia em qualquer regiao, seja qual for o seu nível de vida ou as suas características intrínsecas socio-culturais”. A produción media actual é de 328.5 Kg/hab/ano, praticamente igual á de Galiza.

No proceso de elaboración do Plano participou un amplio Conselho de Acompanhamento no que estiveron representadas as principais organizacións de defensa do ambiente..